

明通鉴目录

明通鉴目录卷一

是编年经经纬，以考证朔闰及一月内干支，而识其事之所系，仿涑水之例，而稍变通之也。七政之异，纪不备书者，并系之月日分下，仿涑水例，仍增入《明史·五行志》也。年分下各标明正编卷数，以便检寻，此亦温公之原例。中排干支，多据《实录》及《明史》“纪”“志”诸书，亦有无事而正编不具者，以《长编》成之在先，不复删去，且亦藉以考证干支。其大小建偶有不详者，阙其朔而已。

洪武元年著雍涖滩 戊申（明纪一）

正月

壬申朔。

甲戌，告祀南郊。

乙亥，即皇帝位，建元，定有天下之号曰明。○追尊四代祖考妣。○立皇后马氏，世子标为皇太子。○以李善长、徐达为左、右丞相。诸功臣进爵有差。

丙子，诏告天下。○进封皇伯考以下皆为王。

丁丑，宴廷臣于奉天殿。

戊寅，迁新宫。○方国珍至京师，赐第。

辛巳，以李善长、徐达等兼东宫官。谕以周公教成王，召公教康王，在居安虑危，不忘武备。○马后从上军中，躬习劳苦。及贵，上比之芜荑豆粥，滹沱麦饭，又对群臣述后贤同于唐长孙皇后。上欲访后族人官之，后不可，乃止。○上朝罢，从容谓

基言：丧乱之民思治安，犹饥渴望饮食，若更（殴）[驱]以法令，辟以药疗疾而加之以鸩也。○章溢与刘基同拜御史中丞，溢独持大体，不以搏击为能。

甲申，遣周铸等一百六十四人核浙西田亩。以章溢言定处州七县税粮，视宋制亩加五合，余悉除之。以刘基有功，命青田县勿加，曰：使其子孙传为美谈也。○又与基论生息之道，在以仁心行之。

丁亥，御东阁，与章溢、陶安论前代兴亡。又与群臣论学术，安请黜邪说，以兴正道。上曰：仁义，治天下之本。故贾生论秦之亡，在不行仁义之过也。○汤和进攻延平。遣人招谕陈友定，不答。

庚寅，彗星见昴、毕。

壬辰，胡廷美克建宁。

庚子，汤和克延平，执陈友定送京师，并其子皆诛之。○胡美等克兴化，招谕汀州等处，皆纳款，惟漳州路达噜噶齐迪里密实引刀刺喉死。时与陈友定及福州之拜特穆尔并称闽之三忠云。○以邓愈为征戍将军，略定南阳以北州郡。

是月，杨璟败元兵于永州。宝庆卫百户周迪战死，遣官祭之。○元主谕库库。○更定卫制，置卫、所、千、百户等官。○天下朝覲官陛辞，谕以海内初定，与民休息，在于约己以爱人。

二月

壬寅朔，李善长、陶安等进圜丘、方丘及宗庙社稷礼。

癸卯，命汤和提督海运。造舟于明州，运粮输之直沽，以给军食。○命廖永忠、朱亮祖由海道取广东。

丁未，诏以太牢祀孔子，仍遣官诣曲阜致祭。

戊申，始祭太社、太稷。陶安议：建屋非宜，若遇风雨，请于斋宫望祭。从之。

壬子，诏衣冠悉如唐制。

癸丑，常遇春克东昌。

甲寅，杨璟克宝庆。

己未，陶安请制五冕，谕：惟祭天地宗庙服衮冕，余四冕皆不用。

壬戌，敕指挥陆仲亨会师取广东。

乙丑，命中书省定役法。议：“田一顷，出丁夫一人，不及顷者，以别田足之，名曰‘均工夫’。”列为图册。并命罢不急之务、浮泛之役。

丙寅，徐达克乐安。

庚午，选国子生国琦等十余人，侍皇太子读书禁中，因厚赐之。

三月

辛未朔，命翰林学士朱升修《女诫》，辑古贤后妃事可为法者，使子孙知所法守。

壬申，杨璟克全州。

甲申，徐达奏下山东州县。近臣请开山东银场，不许。

戊子，谕山东郡县访求贤材，凡仕元者，皆予录用。

辛卯，彗星出卯北，逾月始没。

丙申，邓愈克唐州。

丁酉，克南阳。

己亥，徐达克汴梁，左君弼降。

是月，遣官祭告仁祖陵。

四月

辛丑朔，蕲州进竹簟，却之。命四方无妄献。○廖永忠至广州，元行省左丞何真降。遣使驰谕海南、海北诸道，皆纳印请吏。以真识时务，擢行省参知政事。

丁未，裕享太庙。

戊申，命诸臣图古孝行及身历艰难战伐之事示子孙法守。○

徐达大破元兵于洛水，元梁王降，遂取河南路。

己酉，彗星没。

壬子，常遇春克嵩州。

甲寅，分兵下诸山寨。

丙辰，禁宦官预政典兵，因论汉、唐宦官之祸。

丁巳，杨璟克永州。

戊午，元巩县孟夏寨参政李成降。

庚申，元福昌、钧州、许州、陕州守将、知院皆遣人诣大军降。

辛酉，傅友德取福昌山寨。常遇春下汝州，河南悉平。

壬戌，冯宗异克陕州。○大军定裕州，执元守将郭云，送京师。上嘉其忠义，释而用之。○免山东被兵税粮，并振之。

甲子，车驾幸汴梁，发京师。

丙寅，冯宗异克潼关，李思齐、张思道遁。

是月，曲阜孔克坚来朝，赐宅，留京师。○置山东行省，参政以汪广洋为之，陶安为江西参政。

五月

庚午朔，冯宗异调郭兴兵守潼关，回师至陕州，与大将军达俱还河南。

己卯，廖永忠次梧州，元守将拜珠降。朱亮祖次藤州，守将吴镛降。

甲申，月掩犯填星。

庚寅，车驾幸汴梁，召大将军等诣行在。

辛卯，常遇春、冯宗异自河南来谒行在，诏宗异留守汴梁。

癸巳，置中书分省于开封。

甲午，朱亮祖克容州，郁林、浔、贵诸郡悉平。

丁酉，命何文辉扈从，授河南卫指挥使，康茂才守陕州，任亮守嵩州。

六月

庚子朔，徐达朝行在，宴劳，问北征计。谕：元君出塞，毋穷追。

壬寅，上躬祀开封府诸神，遣官祭境内山川。

癸卯，徐达辞行在，命会副将军之师于河阴。

甲辰，元海南、海北道皆纳款。

壬戌，杨璟、朱亮祖克靖江，元佥事特穆尔布哈等死之。

乙丑，赐北征将士夏衣。

戊辰，廖永忠克南宁。

是月，定国子学官制，增设祭酒、司业等官。○遣官祭元察罕特穆尔。

七月 闰附

己巳朔，太白犯斗。○广西左、右江土官纳款降。○元平章阿思兰败遁，遣子僧保请纳款，许之。○邓愈克随州。

壬午，吴复讨新寨，平之。

戊子，廖永忠下象州，阿思兰降，广西平。

庚寅，命振恤中原贫民。

辛卯，上将发汴梁，还京师，大将军等自陈桥入辞。谕诸将克城之日，毋掳掠，毋焚荡，毋妄杀人。

丙申，车驾发开封。

丁酉，杨璟自靖江振旅还。○都下火，延烧永济仓。

是月，舍人周宗请天下府州县皆设学校，上嘉纳之。○广东既平，有南海县民关敏，讨贼被杀，事闻，诏赠官，立祠祀之。

闰月

己亥朔，徐达、常遇春遣将分徇河北地。

庚子，薛显、傅友德至卫辉，元平章龙二走彰德。

辛丑，克卫辉。

癸卯，至彰德，龙二复走，其将陈同知降。

甲辰，下磁州。进攻广平、赵州，皆下之。友德等遂会师于临清。

丁未，车驾还京师。

己酉，大师次临清，水陆之师分道并进。

庚戌，傅友德开陆道。顾时浚闸，通舟师。

癸丑，大师北发，会常遇春已先驱克德州。

戊午，克长芦，扼直沽河，燕都大震。

癸亥，大败元兵于河西务。

丙寅，克通州，元主北遁。

是月，诏定军礼。中书省会儒臣议亲征遣将礼奏之。○诏征天下贤才至京，授以守令。定制，除府州县官，赐白金十两，布六匹。又谕北方守令，安集新附之民。○诏免吴江、广德、太平、宁国、和、滁水旱灾租。

八月

己巳朔。

庚午，徐达克元都。元淮王特穆尔布哈及中书左丞庆通、平章德尔毕什、保赛音布哈、右丞相张康伯、御史中丞穆辰等不降，俱死之，余不僇一人。封府库图籍，守宫门，禁士卒侵暴。○元翰林待制黄殷仕投井死。左丞丁敬可、郭允中皆死之。献捷京师，送威顺王子六人至京。

壬申，以京师火灾，四方水旱，诏中书省集议便民事。

甲戌，徐达遣人诣东昌，令韩政分兵守广平，又遣华云龙筑元都新城垣。○张兴祖下永平路。

丁丑，始定六部官制。每部设尚书、侍郎等官，仍隶中书省。又各部设郎中、员外、主事等官佐理。○御史中丞刘基致仕。先是上幸汴梁，令基与李善长居守，遂有隙。至是上以早求言，基所奏忤旨。会有妻丧，遂告归。

己卯，以元都平，诏大赦。议利害当兴革者。

壬午，上幸北京。定应天为南京，开封为北京。寻改大都路曰北平府，置六卫。

癸未，诏徐达、常遇春取山西，命汤和、冯宗异、杨璟等从行。

甲午，放元宫人。○荧惑犯太微西垣上将。

是月，以滕毅、钱用壬、杨思义、周桢为吏、礼、户、刑四部尚书。初，召南康同知王祎还，与诸臣议礼，坐事忤旨，出为漳州通判。至是上书言祈天永命之要，在体上天生物之心。时上反元政，尚严厉，故祎以为言，上嘉纳之，然不能尽从也。○诏征元故官至京师。

九月

戊戌朔。

癸卯，江西参政陶安卒。安事上凡十有四年，所陈皆王道，所论皆圣学，故君臣契合，宠遇不衰，始终一致。先是安人为侍从，信任方专，有御史忌之，刺其隐微之过者，上命黜其人。中书省谓：御史居言路，有失宜容之。上曰：去小人，当如扑火，及其未盛而扑之，则易为力，否则害滋大矣。上闻安卒，亲制文祭之。

戊申，荧惑犯右执法。

癸亥，诏求天下贤士，讲明治道，有能辅朕济民者，有司礼遣。

乙丑，常遇春下保定。

丁卯，下中山，遂趋真定。元达鲁噶齐济农实克章朝服投崖死之。

是月，定正旦朝贺及中宫朝贺仪。

十月

戊辰朔，徐达遣刘聚守河间，兼领府事。

庚午，克怀庆，元平章白素珠弃城遁。遂逾太行，破碗子

关，元兵奔溃。分兵进取泽州，克潞州、雄州。

丁丑，车驾还京师。

戊寅，以元都平，布告天下。

甲午，司天监进元所置水晶刻漏，中设二木偶人，自击钲鼓。上曰：是作无益害有益也，命碎之。

是月，置京畿漕运司，以龚鲁、薛祥为都转运使。

十一月

戊戌朔。

己亥，诏詹同、文原吉分行各府州县访贤才。

庚子，冬至，始祀天于圜丘。坛二成：第一成昊天上帝，南向；二成东大明星辰，西夜明太岁，用陶安等议也。有司请配祀，上谦让不许，先期亲为文告太庙：南郊竣事，仍恭诣庙廷，告成大礼。

辛丑，建大本堂，取古今图籍充其中，征四方名儒以教太子、诸王。上时临幸堂中，一日，御文楼，问太子读史及汉七国事，太子言曲在七国。上曰：景帝为太子时，以博局杀吴世子，及为帝，又轻听晁错言，黜削诸侯，其曲不专在七国也。

甲辰，以孔子五十六代孙希学袭封衍圣公。立孔、颜、孟三氏学。

癸丑，徐达克赵州，师次保定。元库库遣将攻泽州，杨璟御之韩店，失利而返。○徐达与诸将议直趋太原，皆曰善。

癸亥，上手诏召刘基还。基至，赐赉甚厚，又封其祖、父皆永嘉郡公。

十二月

丁卯朔，徐达克太原，元库库遁走甘肃。

己巳，置登闻鼓于午门外，日令御史一人监之。后又移设于长安右门外，派六科给事中一人监之。

庚午，徐达等败元贺宗哲于石州，傅友德、冯宗异等复取绛

州，以次下山西诸州县，遂平之。

辛未，御史高原侃奏定官民丧葬礼，请颁示中外。从之。

壬辰，遣使谕夏明升归命。

是月，行人汪河被元库库拘留，至是克太原，还京师，擢吏部侍郎。逾年，改侍御史，后迁晋王左相。居数岁卒。○定三师朝贺东宫仪，仿唐制，行四拜礼，皇太子答后二拜，著为令。

是冬，以崔亮为礼部尚书，钱唐刑部尚书。

是岁，授方国珍广西行省左丞，卒善终京师。降臣邱楠、詹鼎皆授官。鼎后迁刑部郎中，坐累死。○北征之役，浙江、江西及苏州等九府运粮三百万石于汴梁，已，又运粮大同，至是定于辽东、北平由海运输饷。○改太史院为司天监。征元太史张佑、张沂等十四人至京师。兼设回回司天监。○陈友定既灭，故将金子隆等复帅众保延平，李文忠禽子隆等，诛之，闽中遂定。○初，上为吴王，命考《周礼》五辂，以玉辂太侈，用詹同言，改用木辂。至是有司奏乘舆服御应以金饰，诏用铜。○上一日还宫，指宫中隙地谓不可起亭台馆榭，因举汉文帝欲作露台，惜百金之费事，以戒之。

二年屠维作噩 己酉（明纪二）

正月

丙申朔。

庚子，御奉天门，召元故臣马翌等，论元失天下，在于纵弛，非宽之谓也。授元臣危素、张以宁为翰林侍讲学士。

乙巳，立功臣庙于鸡鸣山，御定功臣位次，死者塑像，生者虚位。又以廖永安、俞通海、张德胜、桑世杰、耿再成、胡大海、赵德胜七人配享太庙。

丁未，享太庙。定先期斋戒三日。

庚戌，免北平、山东、山西今年租税，又免应天等府。

癸丑，更定太庙时享日期。

甲寅，常遇春取大同。

乙卯，荧惑犯房。

庚申，克大同。

癸亥，定征山西大将军以下位次。

是月，倭寇山东登、莱等郡。

二月

丙寅朔，诏修《元史》。元之亡也，危素不死，大兵迫史库，往告镇抚吴勉辈遂出之，《十三朝实录》得无失。至是开局于天界寺。

庚辰，元丞相伊苏侵通州，曹良臣击走之。

壬午，始行耕藉礼，上亲祭先农。以稷配祭毕，宴百官耆老于坛所。

是月，上仁祖陵曰英陵。寻改皇陵，立《皇陵碑》，命危素撰文。○杨璟征唐州叛卒，平，寻复南阳。

三月

乙未朔，大将军达渡，遣副将军遇春等先驱入陕西。

丙申，以旱灾，祭告仁祖庙。

丁酉，祈雨，祭风云雷雨山川等神，凡为坛十八。

庚子，徐达师至奉元路，张思道遁去。改奉元路曰西安府，令耿炳文守之。○大军至鹿台，元御史桑图锡里投崖死，检校阿什克布哈、郎中昂克、三原尹朱春等皆死之。○关中饥，诏户振米三石。

癸卯，师次凤翔。谕李思齐降，不从，将西入吐蕃。

丙午，至凤翔，思齐奔临洮。

癸丑，始置北平行中书省。

戊午，诏工部增益太学斋舍。

四月

乙丑朔。

丙寅，诏常遇春还师备边、并授李文忠为偏将军、会师取上都。

丁卯，徐达克陇州、进师巩昌。

戊辰，置陕西、山西行中书省。改河南分省为行省。

己巳，诏诸王子受经于博士孔克仁，功臣子弟亦令入学。克仁侍上最久，数与论治道及天下形势、前代兴亡。己，出知江州。坐事死。

乙亥，诏定封建诸王国邑之制。○徐达克巩昌，趣冯胜进攻临洮。

丙子，赐秦陇新附各州县税粮。

丁丑，冯胜至临洮，李思齐举城降。捷闻，令进攻庆阳。谕以张思道兄弟多诈，若来降，宜审处之，勿堕其计中。○顾时克兰州。

乙酉，薛显袭走元豫王于西宁。

是月，淮安、宁国、镇江、扬州、台州各献瑞麦，命以后停止。

五月

甲午朔，日食。

丁酉，大师次萧关，下平凉、延安。

辛丑，张良臣以庆阳降，薛显往受之。

癸卯，夏至祀地方丘，有司请配位，不许，曰：“俟庆阳平议之。”○上祀方丘，患心不宁，宋濂言：“养心莫善于寡欲。”上善之。

戊申，张良臣据庆阳叛，薛显被伤还。徐达闻之，亟趋庆阳，围其城。

是月，御史中丞章溢卒。溢奉诏部乡兵北征，行到处州，遭母丧，请守制，不许。乡兵既集，始许之。溢悲戚，营葬毕，感

疾卒。○追封外大父陈公为杨王，大母王夫人，皇后父马公为徐王，母郑氏王夫人，皆建庙祀之。

六月

癸亥朔。

乙丑，常遇春发北平。

己卯，克开平，元君北走，蓟北悉平。

辛巳，张良臣遣人求援于库库，遇大军，击斩之。

壬午，安南入贡，遣使封陈日燾为安南国王。

壬辰，荧惑犯东咸。

七月

癸巳朔。

甲午，徐达遣降将李茂帅骑兵千人往隆德、秦安招捕诸未附余党，悉平之。

己亥，鄂国公常遇春卒于军。诏以李文忠领军事，会大军攻庆阳。

辛亥，元库库遣将攻陷原州，寻陷泾州。

辛酉，冯胜援泾州，击元将，走之。还屯驿马关，以遏庆阳之援。

八月

癸亥朔。

丙寅，元兵寇大同，李文忠击败之，执图鲁卜，送京师。上命释之。

己巳，命吏部定内侍诸司官制。

癸酉，《元史》成。时上复遣儒士欧阳佑等十二人往北平、山东采求遗事。

丙子，封王颙为高丽国王，颙遣使贡方物。

癸未，徐达克庆阳，张良臣伏诛。贺宗哲攻凤翔，解围去。于是陕西悉平。

庚寅，庆阳大雨雹，伤禾稼。○诏儒臣纂《礼书》。

是月，赐夏明升书。令归命，不省。○诏设京卫军储仓。

九月

壬辰朔。

辛丑，诏徐达、汤和班师还，冯胜留总军事。

癸卯，诏以临濠为中都，置城郭宫室，如京师制。

戊午，诏廖永忠、朱亮祖班师还，命皇太子郊迎。

是月，天寿节，祭寿星。

十月

壬戌朔，遣杨璟招谕明升。

甲戌，甘露降钟山。宋濂言灾祥，引《春秋》，谓“书异不书祥”。上然之。

辛巳，冯胜引兵还，上怒，切责之。

辛卯，诏天下府州县皆立学。

是月，贻元主书，不报。

十一月

壬辰朔，大将军达还自陕西。

乙巳，冬至，祀天于圜丘，始奉仁祖配。

丙午，遣中书照磨兰以权赍诏往谕左、右江溪峒官。改左江路曰太平府，右江路曰田州府，皆以土官世袭。

十二月

壬戌朔。

甲子，日中有黑子。

甲戌，封阿答阿者为占城国王。

己丑，大赉平定中原及征南将士。

庚寅，元库库寇兰州，指挥于光死之。

是岁，征处士陈谟至京师，授官，引疾辞。后屡应聘主江浙考试官，著书教授以终。

三年上章掩茂 庚戌（明纪三）

正月

辛卯朔。

癸巳，命徐达为征北大将军，李文忠、邓愈、汤和副之，分道北征，并授方略。

壬寅 吏部请谪罪人于儋崖，上以弃之化外，不许。

二月

辛酉朔，上游后苑，见鹊巢卵翼之劳，令群臣有亲老者许归养。故元镇抚陈兴，被俘至京，言有母在嵩州，年八十余，求归，赐白金衣服而遣之。

乙丑，以欧阳佑等采元遗事至，诏续修《元史》。

癸未，追封郭子兴为滁阳王，妻张氏王夫人。立庙滁州。

戊子，诏六部访求贤才可任部务者。

是月，始定朝日夕月礼专祀，天神地祇合一坛祭之，又增四季月将之祀。○召诸郡县富民至京师，面谕，赐酒食遣之。○华云龙下云州，汪兴祖下武州、朔州。

三月

庚寅朔，诏免南畿、河南、山东、北平及浙江、江西、广信、饶州今年田租。

壬辰，享太庙，以忠武公常遇春配。

丁酉，郑州知州苏琦上言三事，命中书省采行之。

戊戌，蠲徐州、邳州夏税。

是月，以滕德懋为户部尚书。○倭寇登、莱。

是春，衍圣公孔克坚以疾告归，行次邳州，卒。

四月

己未朔。

乙丑，封皇子棖等九人皆为王，又封从孙守谦为靖江王。

丙寅，大将军徐达破元库库于定西。

丙戌，元主崩于应昌，子阿裕锡哩达喇嗣。顺帝号庚申君，相传宋瀛国公子也。

是月，安南王陈日烺卒，其兄子日烺嗣，遣张以宁往封为安南国王。○置弘文馆，以刘基、危素为学士。寻谪素居和州，逾二岁，卒。○召宋濂宿大本堂议五等封爵。

五月

己丑朔，徐达克兴元。○邓愈遣人招谕吐蕃。

甲午，置司农司于河南。

乙未，诏严宫闈之政。

丁酉，李文忠次开平，闻元帝殂，兼程趋应昌。

己亥，诏设科举取士，定试期及制义八股式。

癸卯，文忠至应昌，元嗣主北遁。

甲辰，克应昌，获元主之孙密迪哩巴拉及后、妃、诸王，送京师。

丁未，诏行大射礼。

戊申，夏至，礼地方丘，奉仁祖配。

辛亥，郑愈克河州，吐蕃纳款。

是月，颁科举诏于高丽、安南、占城。○都督孙兴祖等出塞战没，诏赠恤有差。○以久旱，祈祷斋戒。

六月

戊午朔，上素服草屨，徒步至坛，日曝夜卧于地，凡三日。诏省狱囚，命有司访求通经术者。

壬戌，大雨。

癸亥，诏罢山川前代封号，皆称郡县山水之名。

壬申，李文忠捷奏至，命仕元者勿贺。谥庚申君曰顺帝。

乙亥，元密迪哩巴拉至京师，令勿献俘，所得宝器藏之库。封密迪崇礼侯，赐第龙光山。后妃宫人皆善遇之。